

Kutambuka mu Etaata dya Kilombeeno Kipya.

Kipindji 3 : Mufubo wa Kikudi-E-Selele.

Bifundwe tanabyo bupeeka kipaso kya kulombola mwina Kilisto mu lwendo lwaye pa senga nya. Apaakula Fumu na balongi baaye shi aka katuka pa senga, aye ebalungula bino : « *n’ami, nakatekye Yaya, n’aye akenupa mungi musambi, bwa kwikala nenu yikalayika, Kikudi ki’eyendo, yawa abashi byakutambula kwi bena senga, mwanda’shi tabamumono na tabamuwuku nya ; ank’anwe, anumuwuku, mwanda’shi e nenu, na ekala munda mwenu* » Yoano 14:16-17.

Mu kino kishingatshilo [Boose], mwi ingi myaku ayitungu kushimikiila :

1. **Musambi** : mwanda Fumu ta baadi akyebe ku katuka pa senga aye bapu kukaba na kulombasha mufubo wa kipandjilo uba mupeele shaye, ebalungula bwa ungi musambi, uno mwaku « Ungi » awulesha shi uno ungi musambi epamune bu bi Fumu nabeene, pamune na Yaya na Mwana. Enka kwanka pa mwanda wa kupudisha nkalo ya ba mukumine na abatulu Fumu ebedi mu mashimba aabo. Fumu atenteka ni shi : « Nta nkenulekye bu bana ba shiye nya » Yoano 14:18. Fumu baadi n’eshimba dya kulama balongi baaye na boso ba bipungo abilondo bishi baadi akumina kupa bulami kwi ungi muntu nka kwi Efile-Mukulu nabeene mu bu muntu bwa Kikudi-E-Selele.
2. **Kuku a nguba oso** : Akekala « nenu yikalayika » Mu kilombeno kikulu, Kikudi-E-Selele baadi atembela mwilo w’Efile-Mukulu anka tabaadi ashala nabo nya. Fumu ashikamisha shi Kikudi-E-Selele aki kashala yikalayika. Aki kekala nabo pa mwanda wa kwi bakwasha mu myanda bipindji byoso. Bikisheke misango yoso, ano mafuku, bena kukumina abapimi bya kupeta byabo bipeta pabadi kumpala a myanda. Mbikile buwa kukimba bukwashi kwi yawa ena nkulo yetu kw’eshimba.
3. **Penda bena kukumiina mwi Yesu Kilisto** : Bi patooka shi : « Senga » kwamba shi, boso betwifunyishe na bashina lukalo na Fumu Yesu sunga kubasuka ngikashi yabo kumpala Efile-Mukulu, tabawuku shi Kikudi ki n’etu. « Senga taya kupeta » Kikudi-E-Selele bu bibakula kishingatshilo kya tubalanga kunundu. Penda bena kukumiina ngi abekipete.
4. **Kikudi ky’Eyendo** : Twikwakula shi Kikudi-E-Selele ni Efile-Mukulu, takwakwikala kingi kintu nka eyendo mwadi su ? Fumu akula shi : « Ami ne Eyendo » byabya bykyamune eyendo kwi Kikudi-E-Selele. Tatwa kwela mpaka pa mwanda wa Kikudi-E-Selele nya. Yoano ende kula na ateluula mayii a Fumu na kwambashi : Anka apakafiki musambi, yawa akatukila kwi Yaya anke nutumina mi, Kikudi ky’eyendo akatukila kwi Yaya yawa akalesha bu kamoni ku mwanda wande ». Fumu Yesu nyi akumpala

kulesha bu kamoni pa mwanda wa Kikudi-E-Selele. Twina, mu kino kishingatshilo, bu umune bw'Efile-Mukulu mu bantu basantu.

Bifundwe abitulesha patoka angi mashina a Kikudi-E-Selele, kina mwanda kyaye nkwi tulambukisha. « Anka Musambi, Kikudi-E-Selele, akikatumwa kwi Yaya mwishina dyande, aye, akenulambukisha bintu byoso na akenutentekyesha bintu byoso binanenulungwile » Yoano 14:26. Mwina kukumiina, ena bukwashi bwa Kikudi-E-Selele, bikishekishe mu kulonga kwa bifundwe. Aye ake aketuntekyesha bintu byatudi bapwe kulonga na kwitulongyesha bipatulwilo bya bintu bypya bya tuka tundula' shi abikalanga bifyame kwatudi.

Kukankamika kwa bena kukumiina kwa kwikala na Kikudi-E-Selele bu mukunkushi. « Anka apakafiki Kikudi ki'eyendo, akenukunkusha mwiendo dyoso : mwanda tanakule mu matalwa aaye'ye nabeene nya ; anka akakula kyoso kyakekala mupushe, na akenulungula myanda ayikyebe kufika ». Yoano 16:13. Bibya kwikala bishi bibofule kwi muntu ; mukumine sunga shi mukumine bya kutundula eyendo pa mwanda su ngumune. Anka twikwikala ba kumine shi Kikudi-E-Selele ake tulombasha ku eyendo su atutemesha abi longyesha bifundwe.

Mu mukanda wa Mikitshino ya batumimbwe, mwi bipindji bibungi abileshe mufubo wa Kikudi-E-Selele munkatshi mwa bena Kilisto. Bishingatshilo bibungi abileshe mufubo waye. Kwi kumweneka kwa kumpala kwa kwileesha kwa Kikudi-E-Selele : « Na babekeele booso bawushiibwe na Kikudi-E-Selele, na bababangile kwakula mu yingi ndimi, muyile bibebapanga Kikudi bya kwakula » Mikitshino 2:4. Byabya bibafwishishe kipaso kya kya ku kanya kwi booso ba bebipushishe ; kubayikeele mwabi ukata anka namu na makyenga muyile mubaadi Kikudi abalombola.

Kulombola kwa Kikudi-E-Selele bwa kukambila ba pasha.

Kupetekyelwa kwa Kikudi-E-Selele ku balayilwe pa mwanda wa kulwa ngoshi na myanda palapala yibukopo. Pa babatwala balongi kumpala a tshite mwakwidi na bangi, atu badika shi : « Anka Mpyele, bu bibaadi muwushiibwe na Kikudi-E-Selele, bebalungwile'shi: Anwe ba mafumu ba mwilo na bakulu ba mu Isalele » Mikitshino 4:8 babe baposwele. Ndutumbu kini bu batukile dyadya efuku kwi « bena dyabo » Mikitshino 4:24-32. Balongi baba tentekyeshe pangi a Fumu pa baadi ebalungula mwanda wa kipindji akikafiki pa mwanda wa Isalele. « Anka'nwe, dimukayi anwe banabeene ; mwanda abakenufisha ku tumilaadi, na nwanakupilwe mu bitumbwilo ; na nwanayimukye ku mpala kwa batontshi na bafumu pa mwanda wande, byabidya kwibakwasha bukamoni. N'abitungu'shi mukandu wi buwa ulungudiibwe kwibedi mu mawumbo oso. Na pabenutwala mu kwinufisha ku kiimu, tanukalakalanga kumpala'shi atukakula kini, na tanwilongyelanga [mwisambo weenu] ; kyoso akikenupeebwa mu yaya saa, nwikyakule ; mwanda tanaanwe abakula anka ni

Kikudi-E-Selele. Maako 13:9-11. Baba bandjile kikitshino ka pa bwakyo pa abikakitshika ku mafuku aa kafika.

Bukunkushi bwa Kikudi-E-Selele kwi be mu Kakongye.

Kingi kipindji ki buwa ki bamweneka pakwi kakeena kitale bantu bashi basadibwe . Mpyele bakalwila mpolo na Balanabase na kulonda biba mwene kwa Konelyo na kwakula' shi : « N'Efile-Mukulu awuku mashimba, bebatelulwila bukamoni, pakwibapa Kikudi-E-Selele bu bibetupeele atwe banabeene ; na tamutuule kwilekeena pankatshi peetu nabo, pakusuula mashimba aabo ku lukumiino ». Mikitshino 15:8-9. Kipongo kipya ki bafunguka ku bikitshino bipya bya mashinda Efile-Mukulu ; mbushito kini bu baadi pa kumona baaba bantu a balombolwa na Kikudi-E-Selele.

Bushito bwa kwikala balombolwe : Mpolo ba bandjile kino ki kitshino pa lwendo lwaye lwa bulungudi. Baadi na lukalo lwa kulungula mwanda wa Fumu kula-kula, anka baadi atengyela bulombodi bwa Kikudi na ku kokyela Efile-Mukulu, n'aye na bantu babaadi nabo, ba baadi « Na babakiile mu mapya a ku Fidishi na mu'ewumbo dya Ngagateya, babaadi babambiibwe kwi Kikudi-E-Selele bwa kulungula eyi mu Ashiya » Mikitshino 16:6. Banga ba mukatshi mwetu aba kokyela ku bulombodi bwa Kikudi-E-Selele pa kipele ? Elondo dikya ditungunuka : « na pababafikile mu Mishii, babatompele kwenda mu Bitshini, anka Kikudi kya Yesu tankibape bulungantu nya » Mikitshino 16:7. Akupu : « Na pabamwene kimonwa, nka paapa tubakimbile bya kwenda ku Masedwane, tubawukile'shi Fumu betwitanyina mu kwibalambukisha » Mikitshino 16:10. Mulayi kini wi buno buwa wa ku tengyela bulombodi bwa Kikudi-E-Selele, kabidi, Mpolo atentekyesha Bena Kolente kipindji kibaadi nabo p'akula'shi : « anka atwakula wa bukalabwino bw'Efile-Mukulu mu kifyame, [bukalabwino] bufyame, bwabwa bubalongamishe Efile-Mukulu kwibedi kwa bipwa bwa ntumbo yeetu ; ... anka Efile-Mukulu betusokwela kyanka ku Kikudi kyaye ; mwanda Kikudi akifiwuula bintu byoso mpaa na bintu bifiibwe kwi Efile-Mukulu » 1 Bena Kolente 2:7-10. Mufubo wa Mpolo ubaadi ukokyele ku bulombodi bwa Kikudi-E-Selele.

Kwi Kakongye ka Bena Tesalonika, Mpolo eba fundjila bino : « Mwanda mukandu wibuwa weetu tangufikye kwanudi penda mu'eyi bupenka nya, anka na mu bukome, na mu Kikudi-E-Selele, na mu kyukilo kikata kilombanyinine ; mwanda anuuku bibatudi munkatshi mwenu pa mwanda wa kifulo kyenu. Na nubafiki bambudi betu na ba Fumu, pakutambula eyi [dishindjikilwe] na malwa akata, na muloo wa Kikudi-E-Selele » 1 Bena Tesalonika 1:5-6. Ku tesalonika bi kudi bi bungi bibaadi bipashibwe mu kwi kutwena kwibungi, Kikudi-E-Selele kibaadi aki lombola Kakongye kapya na kaningye, bibaadi a bibapa muloo wibungi.

Twieye bino bileshesho na tutumbule Fumu bwa buno bupeta mwishinda dya pa senga. Bibuwa twikale atutentekyesha bantu bamunwe bu babaadi ba kunkushibwe na Kikudi-E-Selele. Bantu babadi abasangulwa pa mwanda wa kutala babaadi na nkalo kukwashibwa ku Yelushaleme.

Balangi babalesheshe kalolo baadi bya kusangudibwa :

« Bakwetu talaayi meeso pa balume musambobidi ba munkatshi mwenu, bena ntelulwilo e [buwa], bawuule na Kikudi-E-Selele na bukalabwino, batukatuulu ku uno mwanda » Mikitshino 6:3. Kukita mufubo wa Fumu ta kubaadi ku bulombodi bwa muntu oso nya. Bantu babatulwe babadi baleshe mu muwa wabo, kululama na kufubishibwa na Kikudi-E-Selele, kaasha penda'shi bibaadi na bushito pa mwanda wa mu kikudi, anka namu ni bushito pa mwanda wa kulama na kufubila mwilo w'Efile-Mukulu.

Mu kuteka: Kwi bipungo bya tupusha booso bukopo bwa ku teka ; tatwi bya kuleesha nangunangu yetu, sunga twebitula mu milongo kalolo dimo, Kikudi-E-Selele afiki pepi netu. « Anka byabya namu Kikudi etukwasha mu kubofula kwetu ; mwanda t'atuuku kilombeene kuteka buu byabikyebe ; anka Kikudi nabeene etutekyelaa na kwiambiila kwatushii bya kupatuula ; na yawa awuku bii mu mashimba awuku kii kinangu kya Kikudi, atekyela bee selele, muyile abikumina Efile-Mukulu » Bena Looma 8:26-27.

Twina bya kwikala na lutumbu kwi'Efile-Mukulu mwi tupe Kikudi-E-Selele pa mwanda wa kwitu kwasha, kwitulongyesha na kwi tuludika mu nshalelo.

Bya tudya kushinkamisha'shi atu tambuka mu etaata dya kilombeno kipya.

Kano kakanda kaluulwe mu Kisongye mu Kabinda, mweshi wekumi mu 2024 kwi bakwetu bano :

- ✓ **Arthur NYINDU ASSANI,**
- ✓ **Esther KIMANKINDA YANGONGO**
- ✓ **Ivon KILUBA KIBAMBE,**